



Najugaqarfik Elisibannguaq  
Esbjergvej B 751  
Postboks 89  
3912 Maniitsoq

28. april 2020

Nal. nr./j.nr.: 2019-900-0026

All. nr./brevnr.: 63025

Sull./sagsbeh.: KJ/jh

## **Najugaqarfik Elisibannguami misissuineq pillugu nalunaarsuaq**

### **1. Aallaqqaasiut**

Najugaqarfik Elisibannguami (matuma kingornatigut Elisibannguumik taaneqartartussami) Maniitsumiittumi misissuineq ilimasaarutigineqareersimasoq Inatsisartut Ombudsmandiannit misissuiartortunit 20. aamma 21. maj 2019-imi ingerlanneqarpoq. Misissuineq taanna Ombudsmandip ataatsimut sulineranut ilaatillugu ingerlanneqarpoq, taamaalillunilu naammagittaalliummik aalajangersimasumik tunngaveqarani misissuinerulluni.

Misissuiartortut tassaapput siunnersortit pisortaat Lasse Risager, fuldmægtig Kamilla Jensen aamma oqalutsi/nutserisoq Ole Heinrich Ombudsmandeqarfimmeersut. Taakkua saniatigut ingerlatami sulisoq Anna Ida H. Jonsson Innarluutillit Illersuisoqarfianni Tiliumeersoq peqataavoq.

Misissuinermi eqqartorneqartut ilaannaat nalunaarusiami matumani ilanngunneqarput.

Elisibannguaq aamma Isumaginninnermut Inatsisinillu Atuutsitsinnermut Naalakkersuisoqarfik nalunaarusiaagallartoq pillugu oqaaseqaammik saqqummiussinissaminnut periarfissinneqarput. Elisibannguup aamma Isumaginninnermut Inatsisinillu Atuutsitsinnermut Naalakkersuisoqarfiup oqaaseqaataat ataatsimoortut Pinaveersaartitsinnermik Isumaginninnermillu Tunngasunik Aqutsisoqarfimmit 28. februar 2020-mi suliarineqarsimasut allak-

katigut 9. marts 2020-meersutigut tiguakka. Oqaaseqaatit taakku nalunaa-rusiami ilanngunneqarput.

## **2. Misissuinerup inatsiseqartitsinikkut tunngavia**

Ombudsmandip sulineranut inatsiseqartitsinikkut tunngavigisaq Inatsisartut Ombudsmandiat pillugu Inatsisartut inatsisaanni (matuma kingornatigut Ombudsmandi pillugu inatsimmik taaneqartartussami) nr. 7-imi, 1. juni 2017-imeersumiippoq.

Inatsisartut Ombudsmandiat Inatsisartunit qinerneqartarpoq, tak. Ombudsmandi pillugu inatsimmi § 1, imm. 1, sulinerminili Inatsisartunut attuumas-suteqarani, tak. § 6, imm. 1.

Kalaallit Nunaanni Namminersorlutik Oqartussat kommunillu ataanni pisor-tat ingerlatsiviisa ilaat tamarmik Ombudsmandip sulinerani pineqartunut i-laatinneqarput, tak. Ombudsmandi pillugu inatsimmi § 7, imm. 1-imi oqaa-seqatigiit siulliit.

Oqartussaasut inuillu Ombudsmandip sulinerani pineqartunut ilaatinneqartut inatsiseqartitsineq atuuttoq unioqqutillugu iliuseqarnersut suliassaminnil-luunniit ingerlatsinerminnut atatillugu allatigut kukkussuteqarnersut sumi-ginnaanersulluunniit Ombudsmandip nakkutigisassaraa, tak. Ombudsmandi pillugu inatsimmi § 19, imm. 1. Ombudsmandi isornartorsiuisinnaavoq, i-nassuteqaateqarsinnaalluni suliamillu paasinninnini aamma saqqummiussin-naallugu, tak. Ombudsmandi pillugu inatsimmi § 20. Pisortat ingerlatsivianni annertunerusumik kukkussuteqarsimanissaa imaluunniit sumiginnaasoqarsi-manissaa ilimagisariartoq Ombudsmandip suliamik suliarinninnerata taku-tippagu Ombudsmandi Inatsisartut Inatsisinut Ataatsimiititaliaannut tamatu-munngalu peqatigitillugu Naalakkersuisunut imaluunniit kommunalbesty-relsimut nalunaaruteqassaaq, tak. Ombudsmandi pillugu inatsimmi § 23.

Ombudsmandi pillugu inatsimmi § 16-imi oqaaseqatigiitsigut siullertigut aa-lajangersarneqarpoq paaqqinniffiit suliffeqarfiilluunniit Ombudsmandip suli-

nerani pineqartunut ilaatinneqartut suulluunniit Ombudsmandip misissorsinnaagai. Taamatut misissuinermut atatillugu – Ombudsmandi pillugu inatsimmi §§-ini 19-imi 20-milu aalajangersarneqartut saniatigut – Ombudsmandip pissutsit paaqqinniffiup aaqqissuussaananut ingerlanneqarneranullu tunngasut kiisalu pissutsit paaqqinniffimmik atuisut pineqartarneranut taakkulu pillugit ingerlatanut tunngasut inuppalaartumik misigittartumillu isiginnittaaseq aallaavigalugu naliliiffigisinnaavai, tak. Ombudsmandi pillugu inatsimmi § 16-imi oqaaseqatigiit aappaat.

### **3. Misissuinerup piareersarneqarnera ingerlanneqarneralu**

Elisibannguaq misissuiartussamaarnermik oqarasuaatikkut 25. marts 2019-imi ilisimatinneqarpoq, misissuinerlu pillugu paasissutissat amerlanerusut allakkatigut 2. april 2019-imeersutigut tigullugit. Elisibannguaq tamatumunnga peqatigitillugu qinnuigaara sulisut, najugaqartut ilaqutaasullu tamaasa misissuissamaarnermik misissuiartortunillu oqaloqateqarnissamut periarfissaqarneranik ilisimateqqullugit.

Isumaginninnermut Inatsisinillu Atuutsitsinnermut Naalackersuisoqarfik misissuiartussamaarnermik e-mailikkut 2. april 2019-imeersukkut ilisimatippara. Naalackersuisoqarfiup Isumaginninnermilluunniit Aqutsisoqarfiup misissuinermi alapernaasertitaasutut peqataasinnaanera tamatumunnga peqatigitillugu neqeroorutigaa, tamannalu kissaatigineqarpat ilisimateqqullunga. Naalackersuisoqarfimmit Aqutsisoqarfimmiilluunniit tamatumunnga atatillugu tusagaqanngilanga.

Paaqqinniffik najugaqartullu pillugit allakkatigut paasissutissat assigiinngitsut misissuineq sioqqullugu Angerlarsimaffik Elisibannguamit tiguakka.

Elisibannguami pisortaqatigiit, tassalu pisortaq taassumalu tullersortaa, misissuiartortunit misissuinermi oqaloqatigineqarput. Taakkua saniatigut sulisut 12-it, najugaqartut qulingiluat ilaqutaasullu marluk misissuiartortunit oqaloqatigineqarput.

Elisibannguup initai misissuiartortunit aammattaaq misissorneqarput.

Misissuiartortut ilaquataasooq sulii ataaseq misissuinerup kingornatigut oqaloqatigaat. Oqaloqatigiinneq taanna oqarasuaatikku ingerlanneqarpoq.

#### **4. Elisibannguaq pillugu ataatsimut oqaatigisassat**

Elisibannguaq ulloq unnuarlu paaqqinniffiuvoq Maniitsumiittoq, Namminersorlutik Oqartussanit pigineqartoq.

Paaqqinniffik immikkoortortaqaqfinnut pingasunut agguataagaavoq, taakku illoqarfimmi illuni assigiinngitsuni inissisimapput. Pingaarnertut immikkoortortaqaqfik najugaqartunut qulingiluanut inissaqarpoq, inunnu paaqqutarisarialinnut immikkoortortaqaqfik Ukaliusaq najugaqartunut sisamanut inissaqarluni, immikkoortortaqaqfillu Sikkerneq najugaqartunut tallimanut inissaqarluni.

Najugaqartut misissuinerup nalaani katillugit 18-iupput.

#### **5. Ombudsmandip pingaarnerusutigut naliliinera**

Elisibannguaq paaqqinniffittut najugaqartut angerlarsimaffippalaartunik toqqissisimanartunillu avatangiiseqarnissaannik pilersitsiniarnermik pisortaqtigiit eqqumaffiginniffigisaattut pitsaasunik paasisaqarfigaara.

Paasisakka imaapput pisortaqtigiit sulisullu suliasatik tunniusimalluarlutik unneqqarillutillu isumagigaat, najugaqartunullu pissaanermik atuinerup pinaveersaarneqarnissaa eqqumaffigisorujussuugaat.

Najugaqartut Elisibannguami najugaqarnertik nuannarerpasippaat, sulisunnullu attaveqarluarpassillutik. Sulisut ilaquataasullu paaqqinniffik nersualarlugu eqqartorpaat. Sulisut misissuiartortunit oqaloqatigineqartut isumassuiluartuusut unneqqarissuusullu paasivakka.

Init eqqiluitsuupput, kusanartuullutik, pingaarnepaatullu nuannersuullutik.

Pissutsit arlallit oqaaseqaateqarnissannut pissutissaqalersippaanga. Taakku immikkoortuni tulliuttuni imm. 6-imit 11-mut allaaserineqarput.

## **6. Sulisut kiffaangissuseqarlutik oqaaseqaateqarsinnaatitaanerit**

“Najugaqarfik Elisibannguami immikkoortorta qarfiinilu aaliangersakkat malittarisassallu” paaqqinniffiup pisortaqtigiivinit suliarineqarsimasut misissuineq sioqqullugu Elisibannguamit tigusama ilagaat. Tassani immikkoortoq imaattoq ilaatigut ilaavoq:

“Sulisut Facebook-illit Najugaqarfik Elisibannguaq pillugu kiisalu tassunga tungasunik allasangilluinnarput. Napparsimaneq, inortuinerit, sulinngitsoorneq assitaliinerluunniit ilannguteqqusaanngillat. Unioqqutitsineq nipangersimasussaa-titaanermut malittarisassat tunngavigalugit aqutsisuninggaanniit suliarineqas-saaq.”

Pisortaqtigiit misissuinerup nalaani oqaatigaat najugaqartut illersorneqarnissaat ilaquataasullu akornanni toqqissisimannginnermik paaqqinniffimmullu tatiginninnginnermik misigisimasoqarnissaata pinaveersaartinneqarnissaat siunertaasoq.

Aalajangersagaq taanna pisortani atorfeqartitaasut kiffaangissuseqarlutik oqaaseqaateqarsinnaatitaanerit pillugu malittarisassanut naapertuuttuunersoq pisortaqtigiit isumaliutersuutigisimaneeraat misissuiartortut pisortaqtigiinnut apeqqutigaat.

Pisortaqtigiit nassuiaatitut ilaatigut oqaatigaat tamanna pisortaqtigiit isumaliutersuutigisimagaat, naliliisimallutilli najugaqartut mianerineqarnissaat pingaarnepaatillugu isiginiarneqartariaqartoq.

Nalunaarusiamut matumunnga missingiummi allappunga taanna suliami alami immikkoortillugu suliariniarlugu aalajangertunga, tassanilu Elisiban-

nguup aamma Isumaginninnermut Inatsisinillu Atuutsitsinnermut Naalakkersuisoqarfiup oqaaseqaataat pissarsiariniarniarikka kiisalu taanna nalunaarusiami matumani eqqartoqqinneqassanngitsoq.

Elisibannguup aamma Isumaginninnermut Inatsisinillu Atuutsitsinnermut Naalakkersuisoqarfiup oqaaseqaataat ataatsimoortut Pinaveersaartitsinermik Isumaginninnermillu Tunngasunik Aqutsisoqarfimmit suliarineqarsimasut Naalakkersuisoqarfiup tamanna tungavigalugu uannut nassiuppai.

Pinaveersaartitsinermik Isumaginninnermullu Tunngasunik Aqutsisoqarfiup oqaatigaa sulisoqarneq pillugu ingerlatseriaatsinik misissuineq Aqutsisoqarfiup Elisibannguaq suleqatigalugu aallartissimagaa, matumani paaqqinniffimmi nipangiussisussaataaneq pillugu paasissutissanik erseqqissunik peqarnissaata isumagineqarnera ilanngullugu eqqarsaatigalugu. Aqutsisoqarfiup tamatuma saniatigut oqaatigaa Ombudsmandip oqaaseqaatai Elisibannguup tusaatissatut tigugai, taamaalillunilu "facebookikkut ingerlatseriaaseq" Elisibannguup atorunnaarsissimagaa, sulisullu nipangiussisussaataitanerannik eqqaasissimallugit.

*Oqaatigineqartut maluginiarpakka, sulisullu kiffaanngissuseqarlutik oqaaseqaateqarsinnaatitaanerannut atatillugu tamanna tunngavigalugu annertunerusumik iliuuseqaqqissananga.*

## **7. Ungaluukkat matuat parnaarsaatilik**

Elisibannguup initai misissuiartortut misissuinnermi misissorpaat, matumani immikkoortortaqarfik Sikkerneq ilanngullugu eqqarsaatigalugu. Immikkoortortaqarfik taanna illumi marlunnik quleriilimmi qutsissumiittumi inissisimavoq. Illu kaajallangajallugu ungalusamik aneerasaartarfeqarpoq. Aneerasaartarfik taanna majuartarferujussuarnut aqqusernup tungaanoortunut ataneqarpoq. Aneerasaartarfiup ungalui majuartarfiup tungaanut pukkitsumik matoqarput.

Aneerasaartarfimmit majuartarfiup tungaanut matu parnaarsaateqartoq misissuiartortut misissuinerminni malugaat.

Immikkoortorta qarfiup Sikkernerup pisortaata oqaatigaa parnaarsaat taanna siorna ikkunneqarsimasoq, tassami najugaqartut ilaat sakkortusaartorujussuusinnaasartoq nammineq saniliminnukartalersimammat, tamannalu toqqissisimanngitsitsilersimalluni. Immikkoortorta qarfiup pisortaata oqaatigaa najugaqartoq taanna ungalut matuat qulaallugu ingerlaniarsinnaanngitsosq.

Najugaqartup kiffaanngissuseqarluni sumulluunniit ingerlasinnaaneranik killiliinermut tassunga suna inatsisikkut tunngaviunersoq misissuiartortut Elisibannguami pisortaqatigiinnut tamatuma kingornatigut oqaloqatiginnissutigaat. Suna inatsisikkut tunngaviunersoq pisortaqatigiit imaaliallaannaq oqaatigisinnaanngilaat, oqaatigaluguli killiliisoqarsinnaanngippat paaqqinniffik qanoq iliussagaluarnersoq takujuminaatsorujussuusoq. Pisortaqatigiit oqarput isumaginninnermik suliassa qarfimmi pissaanermik atuineq pillugu Inatsisartut inatsisaat nr. 1, 21. november 2013-imeersoq (matuma kingornatigut pissaanermik atuisarneq pillugu inatsimmik taaneqartartussaq) kingusinnerusukkut allannguuteqartinneqarsimasoq tunngavigalugu aalajangiilluni tigumminninnissamut akuersissut iluaqutaanaviannngitsosq, najugaqartormi nukittungaarmat sulisut aalajangerlugu tigummisinnaanngimmassuk, pineqartorlu sakkortusaartorujussuusinnaasarluni.

Ombudsmandeqarfimmi sulisup parnaarsaat inatsisikkullu tunngavigisaq pillugu isumaliutersuutit taassuma pisariaqalersitai oqarasuaatikkut 27. maj 2019-imi Isumaginninnermut Inatsisinillu Atuutsitsinermut Naalakkersuisoqarfimut misissuinerup kingornatigut nalunaarutigai.

Elisibannguami pisortaqatigiit oqarasuaatikkut 29. maj 2019-imi oqaatigaat Isumaginninnermik Aqutsisoqarfiup parnaarsaat peeqqusimagaa. Taamaatumik parnaarsaatip 31. maj 2019-imi peerneqarnissaa Elisibannguup naatsorsuutigaa.

Elisibannguami pisortaqatigiit oqarasuaatikkut 13. juni 2019-imi oqaatigaat parnaarsaat 11. juni 2019-imi peerneqarsimasoq. Taamaattumik ungalut matuat assaannarnik ammarneqarsinnaalerpoq.

*Parnaarsaatip massakkut peerneqarsimanera maluginiarpara. Taamaattumik tassunga atatillugu annertunerusumik iliuseqaqqissanngilanga.*

## **8. Parnaarsaat kisitsisit atorlugit ammarneqartartoq**

Elisibannguaq misissuineq sioqqullugu allakkatigut 2. april 2019-imeersutigit ilaatigut qinnuigaara paaqqinniffiup matunik parnaarsuisarneq pillugu tunaartarisassai uannut nassiuteqqullugit.

“Sikkernermi matut parnaartartut pillugit paasissutissaq” pillugu e-mailip Sikkernermi immikkoortortaqrarfiup pisortaata Elisibannguami pisortap tul-lianut 12. april 2019-imi nassiussimasaata assilinera ilaatigut tiguara. E-mailimi tassani ilaatigut makku oqaatigineqarput:

“Ataani silamut matut marluupput, [najugaqartup aqqa] isersimatillugu sulisoq qulaanukassaguni matui parnaartalernikuupput, [najugaqartup aqqa] oqorsaate-qarani aneriataarsinnaasarmat. Parnaasaatit nalinginnaasut [najugaqartup aqqa] ilikkarmagit matup aappaa kodelerneqarpoq, kodeli sukkaasuumik ammarsinnaajumallugu qalipaatinik assigiinnik pilernikuupput, qujanartumik [najugaqartup aqqa] ilisimangilai.

Qulaanukartarissat majuartarfiit aamma matulernikuupput taamatulli qalipaati-linnik kodelimmik, [najugaqartup aqqa] eqqarsaatigalugu [...].

Innareerfimmi sillimaniarnermut matu ilorleq kodelertagaangitsoq nalinginnaa-sumik parnaartarpoq, silataaniit ammariaannaasarluni matuersaammik.”

Misissuiartortut immikkoortortaqrarfimmik Sikkernermik misissuinermi paasi-vaat illu inini qullerni ataatsimut pingaarnertut isaariaqartoq. Inimi qullermi inimi ataatsimoortarfimmi inimut allermut illup iluatigoortunik qipisunik ma-juartarfeqarpoq. Majuartarfiit qipisut taakku qisunnik amitsunik ungaluusa-



lersorneqarsimapput, majuartarfiillu ammut isuanni inimi allermiittumi matu ungaluusaq ikkunneqarsimalluni. Inimi allermi illu kaajallallugu aneerasaartarfimmu qisuusumut marlunnik ikuallattoqarnerani matusartunik matoqarpoq. Matut taakkua aappaat inimi ataatsimoortarfimmiippoq aappaalu inip ataatsimoortarfiup najugaqartullu ilaata ineeraata akornanni torsuusamiilluni. Inini allerni najugaqartut marluupput, ininilu qullerni pingasuullutik.

Misissuiartortut malugaat majuartarfinni qipisuni matu ungaluusaq aamma inimi ataatsimoortarfimmi silammut matu sannersartulikkanik parnaarsaatqartut kisitsisit sisamat atorlugit ammarneqartartunik. Parnaarsaatit marluk taakku ammapput. Parnaarsaammi kisitsisit eqqortut aappalaartumik qalipanneqarsimapput.

Elisibannguami pisortaqatigiit misissuinermi oqaatigaat najugaqartoq oqorsaateqarani silamut anisalersimasoq eqqarsaatigalugu matumi silarlermi parnaarsaat kisitsisit atorlugit ammartagaq ikkunneqarsimasoq. Pisortaqatigiit oqarput parnaarsaat taanna sulisumik najuuttoqartillugu unnuakkulluunniit aallaavittut parnaarsimaneq ajortoq. Sulisoq anartarfialiasagaangat inimulluunniit qullermukassagaangat parnaarsaatit taakku kisitsisit atorlugit ammartakkat sivikitsumik parnaarallarneqartarput.

Misissuiartortut Elisibannguami pisortaqatigiit imatut paasivaat najugaqartunut iliuitsit taamaattut inatsisikkut immikkut tunngavissaqarnissamik piumasaaqateqarfiunersut pisortaqatigiit isumaliutersuutigisimanngikkaat.

*Elisibannguaq immikkoortortaqarfimmi Sikkernermi parnaarsaammik kisitsisit atorlugit ammarneqartartumik ikkussinissaminut inatsisikkut pisariaqarneratut tunngavissaqarsimanersoq apeqqt suliami allami immikkoortillugu suliariniarlugu aalajangerpunga, tassanilu Elisibannguaq aamma Isumagininnermut Inatsisinillu Atuutsitsinnermut Naalakkersuisoqarfik allakkatigut oqaaseqaateqartinniarpakka.*

*Taanna nalunaarusiami matumani eqqartoqqinneqassanngilaq.*

## **9. Pissaanermik atuinerup nalunaarutigineqartarsimanginnera**

**9.1.** Elisibannguaq misissuineq sioqqullugu ilaatigut qinnuigaara paaqqinnif-fiup 2018-imi 2019-imilu januarimit martsimut timikkut pissaanermik atui-sarnera pillugu nalunaarutiginninnerit uannut nassiateqqullugit. Elisiban-guup "sulisunut timikkut tarnikkullu annersaanernik nalunaarutiginninner-mi" immersugassat qulingiluat tamanna tunngavigalugu uannut nassiuppai.

Elisibannguami pisortaqatigiit sulisuma ilaannit oqarasuaatikkuq oqaloqatigi-neqarnerminni oqaatigaat najugaqartunut timikkut pissaanermik atuineq immikkut immersugassat atorlugit nalunaarutigineqartussaasoq. Piffissamili pineqartumi taamatut pisoqartarsimangilaq, qanittunnguakkut pisimasoq eqqaassanngikkaanni, tassanilu sulisut najugaqartumut pissaanermik atui-sariaqarsimapput. Pisoq taanna suli nalunaarutigineqarsimangilaq.

Pisortaqatigiit misissuinermi pisoq taanna pillugu itisiliillutik nassuiaatitut o-qaatigaat sulisup najugaqartoq uniisigut eqillugu tigummisariaqarsimagaa inimullu allamut ingerlattariaqarsimallugu, imminut ajoquseqqunagu.

Immersugassap pisumut atatillugu immersorneqarsimasup assilinera misis-suiartortut misissuinermi tiguaat. Pisoq taanna "najugaqartut timikkut tar-nikkulluunniit annersaanerannik nalunaarutiginninnermi" immersugassami allanneqarsimavoq. Immersukkamit tassannga erserpoq najugaqartup suli-soq qatigaatigut tillussimagaa, taamaattumillu najugaqartoq taanna sulisut marluk pineqartup ineeraanukaassimagaat.

Pisortaqatigiit oqaatigaat immersugassap Isumaginninnermik Aqutsisoqar-fimmut nassiunneqarneranut atatillugu immersugassaq alla najugaqartumut atatillugu aamma immersugassartik atoqqullugu innersuunneqarsimallutik. Immersugassaq taanna ajorluartumik suli nassiunneqarsimangilaq.

Tamatuma saniatigut immersugassani qulingiluani Elisibannguamit misissui-neq sioqqullugu tigusanni taakkunani ataatsimit erserpoq sulisoq najugaqar-

tumit kiinnamigut pikunnerneqarsimasoq, taassumalu najugaqartoq sinifimmut tamatuma kingornatigut ajassimagaa.

Pisortaqatigiit misissuinermi oqaatigaat pisoq taanna pissaanermik atuinerit ajoraluartumik nalunaarutigineqarsimanngitsoq, tamannalu pisortaqatigiit kukkunerigaat.

Misissuiartortut sulisoq misissuinermi aammattaaq oqaloqatigaat, taassumalu pisoq alla nassuiaalluni oqaatigaa, tasanilu sulisut najugaqartut marluk nutsullugit allatut ajornartumik avissaartinniartariaqarsimagaat. Pisoq taanna paaqqinniffiup ullorsiutaanut allanneqarsimavoq, pissaanermilli atuineq pillugu immersugassamik immersuisoqarsimanani.

Pisoq taanna misissuiartortut pisortaqatigiinnut tamatuma kingornatigut saqqummiuppaat, taakkulu oqaatigaat pisoq pineqartoq eqqaamasinnaanngikkitsik, nalunaarutigineqarsimasariaqaraluartutulli ittoq.

Pisortap aammattaaq oqaatigaa paaqqinniffiup ullorsiutai sapinggisamik atuarniartarini, pisoqarsimatilluguli suliarortinnani tamatuminnga ilisimatinneqareersimanissani piumanerusarini.

**9.2.** Pissaanermik atuineq nalunaaruteqarnerlu pillugit malittarisassat pissaanermik atuisarneq pillugu inatsimmi §§-ini 53-imit 57-imiipput.

Pissaanermik atuisarneq pillugu inatsimmi § 53, imm. 1-ikkut aalajangersarneqarpoq pissaanermik atuinerit suulluunniit najugaqarfittut neqerorummik kommunimi sumiiffigisami kommunalbestyrelsimut Naalakkersuisunullu nalunaarutigineqartassasut, tak. pissaanermik atuisarneq pillugu inatsimmi § 53, imm. 2.

Malittarisassanik unioqqutitsisoqartillugu, pissaanermillu atuinerup ingerlaqqiinnarnissaanik aalajangiisoqarsimatinnagu, imaluunniit akuliunneq illersuisariaqalernermit ajornartuulernermiluunniit pisinnaatitaanermut atatillugu pisimappat, nalunaarsuineq ingerlaannaq pisassaaq, iliuuserisallu aallartin-

neqarneranit kingusinnerpaamik aqaguani nalunaarsuisoqartassalluni. Tamanna pissaanermik atuisarneq pillugu inatsimmi § 54, imm. 1-ikkut aalajangersarneqarpoq.

Iliuserineqartut nalunaarsorneqartut kommunimi sumiiffigisami kommunalbestyrelsimut Naalakkersuisunullu ingerlaannaq, kingusinnerpaamillu ullut pingasut qaangiutsinnagit nalunaarutigineqartassapput, tak. pissaanermik atuisarneq pillugu inatsimmi § 54, imm. 2.

Pissaanermik atuinermik inerteqqutaangitsumik nalunaarsuineq ingerlaannaq, kingusinnerpaamillu pisup pineqarata aqaguani pisussaavoq, tak. pissaanermik atuisarneq pillugu inatsimmi § 55, imm. 1. Pisut imm. 1 tunngavigalugu nalunaarsorneqartut kommunimut sumiiffigisamut Naalakkersuisunullu qaammatikkaartumik nalunaarutigineqartassapput, tak. § 55, imm. 2.

Pinaveersaartitsinermik Isumaginninnermullu Tunngasunik Aqutsisoqarfiup nalunaarusiamut matumunnga missingiut pillugu oqaaseqaammini oqaatigaa ulloq unnuarlu paaqqinniffinni tamani sulisut pissaanermik atuinerup nalunaarutigineqartarnera pillugu malittarisassanik ilisimasaqarnissaat qulakkeerniarlugu suliniutit annertuut Aqutsisoqarfiup 2018/2019-imi aallartisarsimagai.

Aqutsisoqarfiup aammattaaq oqaatigaa Elisibannguami pisortaatigiit suliullu nalunaarutiginnittarnerit nalunaaruteqarfissanillu immersuisarnerup pingaaruteqassusiinik ilinniarteqqinneqarnerat Ombudsmandip takusimasai tunngavigalugit aallartisarniarini, taamatuttaarlu pissaanermik atuinerit pillugit uppersaatinik nassiussisarnissap pingaaruteqassusia Elisibannguami sulisunut tamanut erseqqissarneqarsimalluni.

Aqutsisoqarfiup taamatuttaaq oqaatigaa ulorianartunik pisoqannginnerani pinaveersaartitsiniarluni suliniutit annertuut qulaani oqaatigineqartut sania-tigut suliniutigineqartut.

*Elisibannguup pisunik pissaanermik atuinertalinnik pingasunik pissaanermik atuisarneq pillugu inatsit tunngavigalugu nalunaarutiginnissimannginnera isorisariaqartutut isigaara.*

*Pinaveersaartitsinermilli Isumaginninnermullu Tunngasunik Aqutsisoqarfiup suliniutit aallartisarneqarsimasut aallartisarniarneqartullu pillugit paasisstissiissutigisai maluginiarpakka.*

## **10. Pissaanermik atuisarneq pillugu malittarisassanik namminerlu aalajangiisinnaatitaanermut akuliunnerit allat pillugit ilisimasaqarneq**

Pisortaqatigiinnik sulisunillu oqaloqatiginninninni paasisakka imaapput najuqaqartunut timikkut pissaanermik atuinaveersaarnissaq pisortaqatigiit sulisullu eqqumaffigisorujussuugaat. Pingaarnerusutigut paasisakka imaapput pisortaqatigiit sulisullu timikkut pissaanermik atuinermut atatillugu suut inerteqqutaannginnerat suullu inerteqqutaanerat ilisimagaat. Aammattaaq paasisakka imaapput timikkut pissaanermik atuneq sulinermi qaqutigorujussuaannaq atorneqartartoq.

Pisortaqatigiit sulisullu arlallit misissuinermi oqaatigaat sulisut pissaanermik atuisarneq pillugu inatsimmik ilinniartinneqarneq ajortut. Pisortaqatigiit oqaatigaat suut inerteqqutaannginnerat suullu inerteqqutaanerat pisullu qaqugukkut allanneqartarnissaat ataatsimiinnerni oqaloqatigiissutigineqartartoq. Pisortaqatigiit oqaatigaat Isumaginninnermik Aqutsisoqarfik nalunaarutiginnittarnerit pillugit siorna ilinniartitsisimasoq, ilinniartitsinerlu 2019-imi julimi neqeroorutigeqqinneqarniartoq.

Sulisut arlallit misissuiartortunit misissuinermi oqaloqatigineqartut ilaatigut pissaanermik atuisarneq pillugu inatsimmi malittarisassat pillugit pikkorisartitsisoqartarnissaa ujartorpaat.

Sulisunik oqaloqateqarninni paasisama saniatigut paasisara unaavoq pisut sorliit paaqqinniffiup ullorsiutaani allassallugit naammannersoq pisullu sorliit

pissaanermik atuisarneq pillugu inatsit tunngavigalugu nalunaarutigissallugit aamma pisariaqartut sulisut arlallit nalornissutigaaat.

Pinaveersaartitsinermik Isumaginninnermullu Tunngasunik Aqutsisoqarfiup nalunaarusiamut matumunnga missingiut pillugu oqaaseqaammini oqaatigaa pisortaqatigiit sulisullu nalunaarutiginnittarnerit nalunaaruteqarfissanillu immersuisarnerup pingaaruteqassusiinik aamma pissaanermik atuisarneq pillugu inatsit ataatsimut isigalugu ilinniarteqqinneqarnerat Aqutsisoqarfiup aallartisarniaraa.

*Paasissutissiissutigineqartut maluginiarpakka.*

## **11. Illumi malittarisassat**

Elisibannguaq misissuineq sioqqullugu qinnuigaara paaqqinniffimmi malittarisassat uannut nassiuteqqullugit.

“Najugaqarfik Elisibannguami immikkoortortaqarfiinilu aaliangersakkat malittarisassallu” Elisibannguamit tiguakka, taakkulu sulisut pillugit malittarisassanik pisussaaffinnillu imaqarput. Malittarisassanik najugaqartunut sammititaasunik tigusaqanngilanga.

Pisortaqatigiinnik misissuineq sioqqullugu oqarasuaatikkut oqaloqateqarnermi Elisibannguup oqaatigaa Elisibannguaq najugaqartut pillugit malittarisassanik allassimasunik peqanngitsoq, ulluinnarnili inuuneq najugaqartut eqqarsaatigalugit aalajangersimasumik ilusilersuineq aallaavigalugu aaqqis-suunneqarsimasoq, tamannali allanneqarsimanngitsoq.

Tamanna pisortaqatigiit misissuineri uppersarparaat.

Ulloq unnuarlu paaqqinniffimmi siunertaq pillugu aalajangersagaq illumilu malittarisassat suliarissavai, taakkunanilu paaqqinniffiup perorsaanikkut anguniagaa kikkullu sullinneqartussaannerat takuneqarsinnaassalluni. Tamanna inunnik annertuumik innarluutilinnik ulloq unnuarlu paaqqinniffiit il.il. pil-

lugit Namminersorlutik Oqartussat nalunaarutaanni nr. 8-mi, 6. december 2018-imeersumi § 1, imm. 3-mi oqaaseqatigiitsigut siullertigut aalajangersarneqarpoq.

Pinaveersaartitsinermik Isumaginninnermullu Tunngasunik Aqutsisoqarfiup oqaatigaa illumi malittarisassat suliarineqarnissaat taakkualu suliarineqartuarnissaat Aqutsisoqarfiup Elisibannguaq suleqatigalugu qulakkeerniaraa.

*Paasissutissiissutigineqartut maluginiarpakka.*

## **12. Malitseqartitsineq**

Elisibannguaq qinnuigaara nalunaarut manna sulisunut, najugaqartunut ilaqutaasunullu ilisimatitsissutigeqqullugu.

Nalunaarusiap matuma assilinera Isumaginninnermit Inatsisinillu Atuutsitsinermut Naalakkersuisoqarfimmut ilisimatitsissutitut nassiuppara.

Elisibannguamik misissuineq matumuuna inaarlugu suliarineqartutut isigaa-ra. Tamatumani oqaatigaara, qulaani imm. 8-imi oqaatigisattut, parnaarsaatinut kisitsit atorlugit ammarneqartartunut inatsisikkut tunngavigisamut tunngasoq suliami allami suliarigiga.

Nalunaarusiaq manna 2020-mi ukiumoortumik nalunaarutinni ilanngunneqarumaarpoq, nittartakkannilu [www.ombudsmandi.gl](http://www.ombudsmandi.gl)-imi tamanut saqqumiunneqarumaarluni.